

四明叢書

張宗祥



四明文徵卷十五

清鄭袁 鈞陶軒輯

侍御史王公行狀

樓鏞

曾祖寂故任永靜軍東光縣累贈少傅 妣趙

氏贈成國夫人 丘氏贈濟國夫人

祖禔累贈少師 姚張氏贈衛國夫人

父次翁故贈資政殿學士左大中大夫致仕累

贈少師 妣趙氏贈秦國夫人

本貫濟南府章丘縣巨德鄉巨人里王公伯庠

年六十有八狀

公字伯禮其先大名府人五世祖繼文贈特進者以明
經出身嘗爲河中府虞鄉縣令四世祖昇贈太保者以
甲科爲尙書郎直史館嘉岐王府翊善十餘年請老而
歸避大河之患葬特進於濟南因家焉少師古學精深
兼通醫卜工眞行草篆尤邃於春秋旣免少傅喪不樂
進取攜二子屏居青崖山之兩河太師因教授其閒以
供甘旨名聞東州學者雲集時號兩河先生紹興初執
政凡四年力丐閒退已遂致其事居於四明西湖之陽

今遂爲鄞人公登紹興二年進士科授左迪功郎吉州
左司理參軍試教官爲第一改充明州州學教授十一
年任滿循左從事郎便親自列主管潭州南嶽廟時太
師方在政府詔以諸將卻敵功皆二三大臣奇謀指縱
之力可與一子職名改左宣教郎直祕閣顯仁皇太后
回鑾太師充禮儀使辟公書寫機宜文字尋主管台州
崇道觀十四年授兩浙東路安撫司參議官太師薨服
除二十二年通判平江軍府尋職罷歸三十年主管台
州崇道觀三十一年賜五品服通判鎮江軍府三十二

年以覃恩轉左朝請郎隆興元年改兩浙西路安撫司
參議官二年省罷知興國軍乾道元年七月召赴行在
除戶部左曹郎官仍有旨復舊職明日兼皇子慶王府
贊讀尋改直講二年南省試進士爲參詳官就院擢殿
中侍御史五月遷侍御史八月罷四年主管台州崇道
觀十二月知閩州五年八月復直祕閣改知夔州兼本
路安撫七年移知溫州九年赴上纔三月終於州治累
官至朝請大夫忠孝謙勤得之天資自幼刻意問學家
素清貧太師教子甚力朝夕講習至於楮衣禦寒手種

苜蓿以充飢及冠猶未知肉味父子易衣以出而抗志
不凡慨然有立名當世之意手鈔古書往往成誦太師
守道州欽宗登位奉表者例當推恩公請以叔父次皋
行旣乃連中世科人益奇之分教四明人士仰慕適與
名士相先後或以見在過去未來三佛名之初被延閣
之命時宰欲擢丞列寺太師旣不欲私其子公亦力辭
焉平江當冠蓋之衝毗贊郡政聲稱甚美會以讒間遭
論自此不復造朝安貧樂道十有餘年若將終其身一
旦趨召際遇聖明首論養人才裕民力理財訓兵以爲

不可騰之備又論攷察薦舉鬻爵積粟等事奏對明白
音吐洪暢上意開納陛楯亦屬耳傾聽爲之咨歎卽日
除戶部郎講讀王府究繹經旨詞義俱勝帝子斂衽受
之迺執法殿中進遷南狀自以起遠外被異知益展盡
底蘊謂強國在法制固國在人心然國勢可振而易強
人心難得而易失乘航之喻不可不知駭輿之言不可
不鑑又奏方今之弊莫大於風俗苟且而苟且之弊生
於士大夫議論之不公惟不以虛言先實用不以高論
蓋真才苟且之風或可少革是時宿將類以罪廢公奏

奔北固爲可罪而戰多有不可掩者不應以一眚而廢之宜及此無事之日以次召還使備環衛撫之以恩折之以威庶可收效於後上深以爲然稍稍錄用沙田蘆場議起租稅民以爲病無敢言者公乃極論之其畧曰沙漲之地未嘗耕耨施工布種乃是務民之本旣未能如漢置力田科以勸農而可擾之乎蘆葦之生本非種植各以其力樵刈必非游手之徒旣未能如古捐山澤之利以予民而可困之乎豪強坐據雖曰非法然怨不及上今朝廷遣官增稅怨始有歸矣上感悟卽令罷去

以便貧民廢省兩浙舶始簡閱宿衛之士皆自公發之
由是眷意愈厚嘗奏事良久上肅容謂公曰卿所言一
一可用議論全似唐王珪公平日恥言人過未嘗臧否
人物恩仇一視坦無城府旣居敢言之地遇事輒發抨
彈所及動涉仇怨無少分顧忌意或爲公危之公正色
曰言責所在顧忠於君者何如爾一有愛身之念紀綱
何賴焉筆力素高作奏不能自休諫稿謹密子弟不得
預論事尙多非施行於外者莫傳也諫長率公論政府
乞置詔獄已乃下其事臨安一日太守請聞公語之曰

始得之風聞不容自默今既事在有司豈復當預獄具
失實卽上章自劾以故俱獲譴而公止從罷免上亦知
其非由於公念之不忘或言去國之後事有涉公所嘗
論者上必取元奏親加省覽而施行之且嘗曰此眞臺
諫也奉祠未幾以閬風起遂易夔帥夔部曠遠夷夏雜
糅公首圖諸郡地理合而爲一分別險要獸蹊鳥道纖
悉畢見區處指授盡出於此人莫得而欺也撫夷人以
寬養百姓以惠馭官吏以嚴夔以大治郡有巨剎旣爲
嵩呼祝壽之地而祖宗諱辰薦修及三歲合五州人事

羣試皆在焉公以爲龐且陋命葺廢事分行香之所又
建貢闈二區以其一與漕司土木之工皆有條理不日
而成士民誦而歌舞之巴倣多略子女以爲貨公特嚴
其禁有綿竹獄掾者捆載而來爲瞿塘關所詰蓋以此
牟利者有年矣公立訊之皆遂寧潼川閒人爲給貲各
還其家或請發其事公曰不可究也惟責而遣之城素
無井見水於山杜少陵所謂白帝城西萬竹蟠接筒引
水喉不乾者郡失於葺或課民以錢詹事王公十朋嘗
縱民取水目曰義泉修王公故事又增治焉市人歡呼

相謂曰二公豈伯仲耶其他營繕非一先賢遺跡如子
美高齋之屬皆以餘力一新之施黔珍三州與南平軍
地接生夷而思州則田氏世襲撫御尤難有何思明任
鬼師楊震穆會等皆豪族動輒疑阻牒訴累興公化之
深得其道宣布威德譬曉禍福揭示要束至或親致尺
書思明投牒乞藏勝於家傳示子孫楊振得書感泣飲
血盟誓邊境帖息公遇事敏明臨機善斷戢吏至嚴莫
敢仰視聽訟之際反覆究問誠意具孚無不退聽者旣
而有伉儷之戚亟問祠祿遂移永嘉赴闕奏事上意欲

留惜公已衰矣到郡篤志從事不少懈而疾已不起實
二月二十五日也娶同郡成氏封宜人柔淑孝謹克配
夫子男三人曰星郎未名而卒曰有大通直郎福建路
提舉事船司幹辦公事後公九年卒曰正大文林郎新
處州軍事推官女三人長適朝請郎中書門下省檢正
諸房公事周舜元次適承事郎汪大有一幼亡孫男十
人坦域埴塆埴埏垓圻餘未名坦埴將仕郎女八人其
一適進士孫瑜餘在室曾孫女一人淳熙元年正月九
日葬公於奉化縣忠義鄉之瑞雲山太師墓側公事親

至孝少時所得成夫人奩具悉以奉太師居喪哀毀盡
禮有人所難及者記問絕人博覽載籍當宣政閒舉子
惟務金陵之學公獨貫穿經史旁出入百氏至老未嘗
釋卷賓客相對諸子侍立奧篇隱帙隨意舉似以探其
學問之進否後生多親附之舍人朱公翌嘗問侍郎周
公綰曰比見表中用一驢載都市事偶忘所出周公素
簡默僅舉一二公適參坐又以目公公歷誦臧質傳中
數十語二公歎賞不已又歸以勵其子焉作文雄奇操
紙筆立就若不經意而語多警拔諸公銘誌類出公手

有歷山集雲安集奏議告蒙資治編年宏詞集要夔路
圖經等藏於家他不及屬稿散落甚眾人雖以公不作
文字官爲恨然崇論宏議日月獻納亦有以少伸素志
矣立朝典州威望凜然而待人接物卑牧已甚閒居客
至應酬終日倒屣延納惟恐其後朝章野服顛倒層疊
人人與之傾寫略無倦色士夫無不愛敬下至閭里閭
風悅服疏財好義不計家之有無義所當爲無所吝惜
四明舊爲義郡顯謨汪公思溫爲之主盟汪公歿公實
繼之緩急叩門視所請曲爲之經理故鄉人尤歸心焉

廉節傳家他無嗜好俸給之外一毫不以費公帑在夔
首禁科買狢麝之類仍以公務鑊版徧滿山谷有以書
求市者則以墨本寄之永嘉軍卒百工咸具公一切罷
遣服用所需必面與之直至或倍償人謂口過而行之
不疑故治溫未久病苦幾半而喪行之日百姓哭巷以
過車非德之感人者深乎僚屬問疾臥內見公几案蕭
然鎮紙以牋皆歎息而退初治入蜀之裝於建康有以
白金來售者曰以此西上當有倍蓰之獲公曰不幾於
商乎止以緡錢行比歸日輕舟而下以餘錢自隨人愈

咨其清方家食時未嘗忘國事凡所聞見必詢究講明
務求可行之實蓋其志尙如此及膺進用期不負所學
以報主知去不以罪人猶望其再入也終不得究見德
業朝野共惜之病且革二子以藥進手格之去靜默焚
香冥坐自如上章休致處畫家事若平時及屬纊不怛
不亂翌日入斂肢體和柔如生皆積善之報也鑰汪出
因外家以拜下風自蚤歲辱知獎閒置坐隅匪怒伊教
殆非一日公將泝江鑰以假吏之燕會別於金山客授
永嘉公適來守尤得窺治行之詳公之二子不鄙以行